

Na osnovu člana 122. stav 3. Zakona o poljoprivrednom zemljištu ("Službene novine Federacije BiH", broj 52/09), federalni ministar poljoprivrede, vodoprivrede i šumarstva donosi

## **PRAVILNIK**

### **O USLOVIMA I NAČINU KORIŠTENJA SREDSTAVA OSTVARENIH OD ZAMJENE, ZAKUPA I KONCESIJE POLJOPRIVREDNOG ZEMLJIŠTA U VLASNIŠTVU DRŽAVE**

#### **I - OPĆE ODREDBE**

##### **Član 1. Predmet**

Ovim pravilnikom propisuju se uslovi i način korištenja sredstava ostvarenih od zamjene, zakupa i koncesije poljoprivrednog zemljišta u vlasništvu države (u daljnjem tekstu: sredstva), početna cijena poljoprivrednog zemljišta u vlasništvu države na natječaju za dugogodišnji zakup i zakup, početna visina naknade na natječaju za dugogodišnji zakup i koncesiju za ribnjake, propisuju se uslovi koje moraju ispuniti fizička i pravna lica za ostvarenje prava korištenja novčanih sredstava prikupljenih od navedenih naknada, uređuje postupak, način isplate, obaveze koje korisnik mora ispuniti prije i poslije prijema novčanih sredstava i propisuje potrebna dokumentacija, te nadzor i kontrola realizacije mjera zaštite i uređenja poljoprivrednog zemljišta

##### **Član 2. Strogo namjenska sredstva**

Naplaćena sredstva iz člana 1. ovog pravilnika je posebna vrsta prihoda budžeta kantona, odnosno općine i vodi se na posebnom računu.

##### **Član 3. Podjela sredstava**

Sredstva ostvarena od zakupa i koncesije poljoprivrednog zemljišta u vlasništvu države dijele se između kantona i jedinica lokalne samouprave u odnosu 70 : 30 u korist jedinica lokalne samouprave.

##### **Član 4. Finansiranje**

Jedinice lokalne samouprave i kantoni sredstva iz člana 1. ovog pravilnika mogu koristiti za finansiranje programa zaštite, uređenja zemljišta i ruralne infrastrukture u skladu sa članom 11. ovog pravilnika.

Sredstva iz člana 1. ovog pravilnika, jedinice lokalne samouprave mogu koristiti samostalno ili ih međusobno udruživati.

Pravo korištenja sredstava namijenjenih finansiranju projekata zaštite i uređenja poljoprivrednog zemljišta imaju fizička i pravna lica koji koriste poljoprivredno zemljište u vlasništvu države ili privatnom vlasništvu, ali je prioritet zemljište u državnom vlasništvu.

Pravo korištenja sredstava namijenjenih finansiranju projekata zaštite i uređenja poljoprivrednog zemljišta imaju fizička i pravna lica, vlasnici i korisnici poljoprivrednog zemljišta i gospodarskih objekata koji se bave poljoprivrednom proizvodnjom (u daljnjem tekstu: korisnik) sa sjedištem, odnosno prebivalištem u Federaciji BiH, a ostvaruju ga u jedinici lokalne samouprave ili kantona u kojoj se to poljoprivredno zemljište i gospodarski objekti nalaze.

##### **Član 5.**

Sredstva se koriste isključivo za mjere zaštite i uređenja poljoprivrednog zemljišta namijenjenog primarnoj poljoprivrednoj proizvodnji.

## II - POČETNA CIJENA I KORIŠTENJE SREDSTAVA

### Član 6.

Početna cijena na natječaju za dugogodišnji zakup i zakup poljoprivrednog zemljišta i početna visina naknade za dugogodišnji zakup poljoprivrednog zemljišta utvrđuje se prema vrijednostima navedenim u tabeli br.1.

Tabela br.1

|                |                                       |                                       |                                       |                                       |
|----------------|---------------------------------------|---------------------------------------|---------------------------------------|---------------------------------------|
|                | oranice                               | livade                                | pašnjaci                              | zapušteno                             |
|                | vtrovi                                |                                       |                                       | trstici                               |
|                | voćnjaci                              |                                       |                                       | močvare                               |
|                | maslinici                             |                                       |                                       | neplodno                              |
|                | vinogradi                             |                                       |                                       |                                       |
|                | zakup,<br>dugogodišnji<br>zakup KM/ha | zakup,<br>dugogodišnji<br>zakup KM/ha | zakup,<br>dugogodišnji<br>zakup KM/ha | zakup,<br>dugogodišnji<br>zakup KM/ha |
| početna cijena | 150 KM                                | 100 KM                                | 80 KM                                 | 30 KM                                 |

Vrijednosti navedene u tabeli br.1 vrijede za kantone i općine i mogu se uvećati ili umanjiti u skladu sa odredbama čl. 7. i 8. ovog pravilnika.

Katastarske kulture zemljišta za utvrđivanje početne cijene i naknade iz stava 1. ovog člana su:

- oranice, vrtovi, voćnjaci, vinogradi i maslinici;
- livade;
- pašnjaci;
- trstici, močvare i neplodno.

### Član 7.

Početna cijena na natječaju za dugogodišnji zakup i zakup poljoprivrednog zemljišta i početna visina naknade za dugogodišnji zakup poljoprivrednog zemljišta uvećava se u slijedećim slučajevima:

1. ako se čestice nalaze u okrupnjenim površinama koje su u funkciji proizvodnje (komasirano i arondirano zemljište i sl.) za 10%;
2. ako je poljoprivredno zemljište meliorisano za 10%;
3. ako jedinica lokalne samouprave utvrdi da je predmetno poljoprivredno zemljište od posebnog interesa (npr. blizina građevinskog područja) za 10%;
4. ako se radi o posebno vrijednom obradivom (P1) poljoprivrednom zemljištu za 20%;
5. ako se radi o vrijednom obradivom (P2) poljoprivrednom zemljištu za 15%.

### Član 8.

Početna cijena na natječaju za dugogodišnji zakup i zakup poljoprivrednog zemljišta i početna visina naknade za dugogodišnji zakup poljoprivrednog zemljišta umanjuje se 50% za neobrađeno, zapušteno ili neplodno poljoprivredno zemljište obraslo višegodišnjim raslinjem, prema nalazu komisije sastavljene od tri člana pravne, geodetske i agronomske struke imenovanog od strane upravnog tijela kantona ili općine nadležnog za poljoprivredu.

### Član 9.

Početna visina naknade u obavijesti o namjeri davanja koncesije za ribnjake određena je kao jedinstvena na području Federacije i iznosi 30,00 KM/ha.

**Član 10.**  
**Korištenje sredstava**

Po odredbama ovog pravilnika mogu se koristiti i naplaćena sredstva po osnovi promjene namjene poljoprivrednog zemljišta za nepoljoprivredne svrhe, koja je posebna vrsta prihoda budžeta kantona i vodi se na posebnom računu, a na osnovu člana 54. Zakona o poljoprivrednom zemljištu može se koristiti samo u slijedeće svrhe:

1. izradu osnova, programa i projekata zaštite, korištenja i uređenja poljoprivrednog zemljišta;
2. provođenje mjera zaštite, korištenja i uređenja poljoprivrednog zemljišta i za inundaciona područja;
3. uspostavu informacijskog sistema za zemljište;
4. zemljišni monitoring;
5. izradu karte upotrebne vrijednosti zemljišta;
6. izradu Projekta višenamjenskog vrjednovanja;
7. realizaciju poslova utvrđenih Strategijom i Programom gospodarenja;
8. dekontaminaciju zemljišta i podizanje zaštitnih pojaseva u neposrednoj blizini putnih komunikacija.

**Član 11.**  
**Finansiranje projekata**

Jedinice lokalne samouprave i kantoni mogu koristiti sredstva za finansiranje slijedećih projekata zaštite i uređenja poljoprivrednog zemljišta, po postupku i uslovima kojim se referišu zaštita i uređenje zemljišta, a sve u cilju dosljedne primjene Zakona o poljoprivrednom zemljištu.

Projekt uređenja zemljišta procesom:

komasacije, arondacije, melioracije (izgradnja i održavanje sistema za odvodnjavanje i navodnjavanje, poboljšanje kvaliteta poljoprivrednog zemljišta, kultivacije livada i pašnjaka, pretvaranje neobradivog poljoprivrednog zemljišta u obradivo), program razminiranja zemljišta, okrupnjavanje zemljišnog posjeda kupovinom ili zamjenom poljoprivrednog zemljišta, agrotehničkih mjera, protiverozivne zaštite, rekultivacije, za poljoprivrednu opremu i mehanizaciju, za saniranje poljskih šteta, za bonitiranje zemljišta, ispitivanje štetnih i opasnih materija u i na poljoprivrednom zemljištu.

Pod agrotehničkim mjerama smatraju se: krčenje, čišćenje, ravnanje i nivelisanje terena, tabliranje poljoprivrednog zemljišta, formiranje terasa za poljoprivrednu proizvodnju, meliorativna kalcizacija ili gipsovanje, meliorativna fertilizacija, meliorativna humizacija, produbljivanje oranice, remedijacija poljoprivrednog zemljišta, osnovna i dopunska obrada, sprječavanje erozije, sprječavanje zakorovljenosti, obavljanje usluga poljoprivrednim mašinama i oruđima, čišćenje kanala, zabrana, odnosno obaveza uzgoja pojedinih vrsta bilja na određenom području, mjere za zaštitu od poljskih šteta, korištenje i uništavanje biljnog otpada, održavanje živica i međa, održavanje poljskih puteva, sprječavanje zasjenjivanja susjednih čestica, sadnja i održavanje vjetrozaštitnih pojasa i dr.

Za navedene namjene sredstva se koriste na osnovu odluka općinskog vijeća, odnosno kantonalne skupštine.

**Član 12.**  
**Svrha projekata**

Projekat zaštite i uređenja poljoprivrednog zemljišta izrađuje se i primjenjuje zbog slijedećih razloga:

1. za grupisanje razbacanih parcela u cilju stvaranja većih parcela;
2. za poboljšanje zemljišta pomoću primjene agrotehničkih i agromeliorisanih i hidromeliorisanih mjera;
3. za pristup javnoj infrastrukturi;
4. za pošumljavanje zemljišta slabog kvaliteta ili zagađenog zemljišta;
5. za stvaranje parcela pravilnih gometrijskih oblika;
6. uređivanje pravno-imovinskih odnosa;
7. nova mjerenja zemljišta;
8. izrada novog katastra.

**Član 13.**  
**Udio sredstava**

Udio sredstava finansiranja u predračunskoj vrijednosti iznosi do 50%, a za strateško područje (manje povoljna područja) u smislu Zakona o novčanim poticajima u primarnoj poljoprivrednoj proizvodnji može iznositi do 60 %.

Korisnik sredstava mora pružiti dokaze o obezbijeđenju ukupnih sredstava do predračunske vrijednosti investicije tj. obezbijediti vlastito učešće i ostale izvore sredstava ako su navedeni u predračunskom iznosu ulaganja (vlastita sredstva, kredit banke ili drugog kreditora, ostalo).

**Član 14.**  
**Udruživanje sredstava**

Sredstva, koja su prihod budžeta jedinice lokalne samouprave ili kantona mogu se udružiti sa sredstvima naknade koja se plaća zbog promjene namjene poljoprivrednog zemljišta i koja su isključivi prihod budžeta kantona, i koristiti za namjene utvrđene u članu 11. ovog pravilnika.

**Član 15.**  
**Program utroška sredstava**

Sredstva naknade koja se plaćaju zbog promjene namjene poljoprivrednog zemljišta, a prihod su kantonalnog budžeta, jedinice lokalne samouprave mogu koristiti isključivo za finansiranje projekata zaštite i uređenja poljoprivrednog zemljišta, odnosno za projekte i mjere osposobljavanja neplodnog zemljišta i povećanja proizvodne sposobnosti ostalog poljoprivrednog zemljišta, ali pod uslovom da ih kantonalno ministarstvo poljoprivrede, vodoprivrede i šumarstva (u daljnjem tekstu: kantonalno ministarstvo) uvrsti u svoj Program korištenja sredstava ostvarenih temeljem promjene namjene poljoprivrednog zemljišta ili im izdvoji sredstva (u daljnjem tekstu: Program).

Program iz stava 1. ovog člana donosi kantonalno ministarstvo, odnosno općinska Služba za poljoprivredu (u daljnjem tekstu: Služba), za svaku godinu posebno, u skladu sa visinom sredstava koji su prikupljeni na posebnom računu kantona/općine za ove namjene.

Program iz stava 1. ovog člana mora sadržavati slijedeće dijelove:

1. podaci o Programu - uvod;
2. period realizacije Programa - sa posebnom naznakom da li se projekti mogu prebaciti u slijedeće godine;
3. ukupna vrijednost Programa - navesti visinu sredstava koja se nalaze na posebnom računu otvoren za ove namjene;
4. namjena Programa - sa naznakom samo za projekte zaštite i uređenja poljoprivrednog zemljišta iz člana 11. ovog pravilnika;
5. raspodjela sredstava-navesti visinu sredstava planiranih za projekte zaštite i za projekte uređenja poljoprivrednog zemljišta;
6. izvor sredstava.

Prijedlog Programa iz stava 3. ovog člana kantonalno ministarstvo, odnosno Služba dostavlja Vladi kantona, odnosno općinskom vijeću, radi donošenja saglasnosti o odobravanju Programa.

### **III - NAČIN OSTVARENJA SREDSTAVA**

**Član 16.**  
**Korisnici sredstava**

Korisnici sredstava mogu biti fizička i pravna lica koji se bave poljoprivrednom proizvodnjom na području kantona/ općine i koji su upisani u registar poljoprivrednih gazdinstava.

**Član 17.**  
**Javni poziv**

Kantonalno ministarstvo, odnosno Služba, će svake godine, a najkasnije do kraja marta tekuće godine, objaviti Javni poziv za dostavljanje projekata zaštite i uređenje poljoprivrednog zemljišta koji će se finansirati od sredstava prikupljenih od naknada iz člana 1. ovog pravilnika.

Javni poziv iz stava 1. ovog člana mora se objaviti u nekom od lokalnih sredstava informisanja.

**Član 18.**  
**Rang vrijednosti i prvenstvo**

Sredstva za zaštitu i uređenje poljoprivrednog zemljišta se mogu koristiti na način propisan u članu 11. ovog pravilnika kojim se utvrđuje rang vrijednosti i prvenstvo za svaku predviđenu mjeru.

**Član 19.**  
**Prijedlog za dodjelu sredstava**

Prijedlog za dodjelu sredstava će zavisi od ukupnog broja bodova za provedene mjere zaštite i uređenja poljoprivrednog zemljišta na osnovu Zapisnika i bodovne liste stručne komisije iz člana 24. ovog pravilnika.

Najveći broj bodova koji se može ostvariti za projekt zaštite i uređenja zemljišta je 100 bodova.

Ako korisnik sredstava pri ocjenjivanju projekta, ostvari manje od 50 bodova, neće steći pravo na novčana sredstva navedena u ovom pravilniku.

**Član 20.**  
**Zahtjev**

Zahtjevi za dodjelu sredstava podnosi se Službi i kantonalnom ministarstvu na osnovu objavljenog Javnog poziva za podnošenje zahtjeva za finansiranje projekata zaštite i uređenja zemljišta.

Sredstva se mogu ostvariti samo kod jednog tijela iz stava 1. ovog člana.

**Član 21.**  
**Parcele predviđene za gradnju**

Za korištenje sredstava naknada iz člana 1. ovog pravilnika mogu se kandidirati i poljoprivredne parcele ili dijelovi parcela koje su prostornim planom općine predviđene za građenje, pod uslovom da općine daju garanciju da u narednih deset (10) godina predmetne parcele neće se koristiti za građenje.

**Član 22.**  
**Dokumentacija**

Za ostvarenje prava korištenja sredstava za zaštitu i uređenje poljoprivrednog zemljišta korisnici su dužni podnijeti zahtjev kantonalnom ministarstvu, odnosno Službi, uz slijedeću dokumentaciju:

1. dokaz o vlasništvu - ZK izvadak ili katastarsku evidenciju ili ovjeren ugovor o zakupu zemljišta;
2. kućnu listu - ukoliko podnosilac zahtjeva živi u zajedničkom domaćinstvu sa vlasnikom zemljišta;
3. druge dokaze o vlasništvu ili suvlasništvu - rješenje o nasljeđivanju, saglasnost suvlasnika i sl;
4. slučaju suvlasništva nad parcelom prilaže se izjava svih suvlasnika ovjerena kod notara da jedan od suvlasnika podnese zahtjev;
5. slučaju da je vlasnik zemljišta umro, podnosi se i ovjereno rješenje o nasljeđivanju ili drugi dokaz da je ostavinski postupak u toku;
6. ovjeren ugovor o koncesiji ili zakupu;
7. kopiju katastarskog plana s označenom parcelom koja će se uređivati, a koja ne može biti manja od 0,5 ha;
8. projekt predloženih mjera zaštite i uređenja poljoprivrednog zemljišta sa cijenom troškova izvođenja radova, urađen ili ovjeren od ovlaštene institucije;

9. dokaz o izvršenoj pedološkoj analizi poljoprivrednog zemljišta prije i poslije uređenja, od strane Federalnog zavoda za agropedologiju ili ovlaštene institucije;
10. izvod iz prostornog plana općinskog organa za prostorno uređenje da kandidirano poljoprivredno zemljište nije prostornim planom općine određeno za građenje;
11. garancija općine - da se u narednih deset (10) godina predmetne parcele neće koristiti za građenje, ukoliko su kandidirane poljoprivredne parcele ili dijelovi parcela prostornim planom općine predviđene za građenje;
12. uvjerenje o izmirenju poreskih obaveza, ne starije od 30 dana;
13. detaljne podatke o investitoru;
14. investicijski program (za ulaganje čija je predračunska vrijednost veća od 25.000 KM) ili projekt s predmetom ulaganja i predračunskom vrijednošću.

Iz investicijskog programa ili projekta mora biti vidljivo za koju kulturu se zemljište priprema, te katastarska čestica zemljišta na kojem se predviđa uređenje, i razrađen troškovnik ulaganja.

Pravna lica prilažu i:

1. bilansu stanja i uspjeha;
2. izvod iz registra ovjeren od strane nadležnog suda;
3. potvrda Uprave za indirektno oporezivanje BiH o podmirenim obavezama.

Nepotpuni zahtjevi neće se razmatrati.

#### Član 23.

Zahtjev se podnosi prije početka radova na zaštiti i uređenju zemljišta na obrascu čiji oblik i sadržaj propisuje kantonalno ministarstvo, odnosno Služba.

#### Član 24.

##### Stručna komisija

Kantonalni ministar poljoprivrede, vodoprivrede i šumarstva (u daljnjem tekstu: kantonalni ministar) ili općinski načelnik će Rješenjem imenovati stručnu komisiju za ocjenu projekata koja se sastoji od tri (3) člana i to: dva (2) predstavnika Ministarstva/općine i jedan (1) predstavnik stručnih i naučnih institucija za poslove poljoprivrede.

Na osnovu Zahtjeva na teren izlazi imenovana stručna komisija.

Komisija iz stava 1.ovog člana će procijeniti opravdanost podnesenog zahtjeva za uređenje i zaštitu zemljišta i predložiti okvirne mjere uređenja za predmetnu parcelu.

Nakon izlaska na teren i procjene opravdanosti podnesenog zahtjeva, komisija pismenim putem izvještava one korisnike čiji je zahtjev za dodjelu sredstava prihvaćen i sa uputstvom korisniku da obezbijedi Projekt zaštite i uređenja zemljišta.

Za korisnike čiji se zahtjev ocijeni kao neopravdan donosi se rješenje o odbacivanju zahtjeva.

#### Član 25.

##### Zapisnik i bodovna lista

Komisija će na terenu, prije formalnog odlučivanja o opravdanosti zahtjeva, obaviti uviđaj i sačiniti Zapisnik o provedenim mjerama na uređenoj parceli (kojim se postupak ne okončava), te sačiniti Zapisnik koji će biti osnov za utvrđivanje bodovne liste pri konačnom odlučivanju o opravdanosti zahtjeva i o prijedlogu visine novčanih sredstava.

U slučaju da Komisija ocijeni da nisu ispunjeni uslovi iz ovog pravilnika, Komisija predlaže, a kantonalni ministar ili načelnik općine donosi rješenje o odbijanju ili odbacivanju zahtjeva korisnika za korištenje sredstava (ne ostvari najmanje 50 bodova, nekompletna dokumentacija, neopravdan zahtjev i dr.) na koje se može izjaviti žalba Federalnom ministarstvu poljoprivrede, vodoprivrede i šumarstva u roku od 15 dana od dana prijema rješenja.

Kantonalni ministar, odnosno načelnik općine donosi rješenje o prihvatanju zahtjeva i visini odobrenih sredstava, nakon čega se sklapa ugovor kojim će se ugovoriti bliži uslovi za korištenje sredstava i realizaciju namjeravanih ulaganja ili drugih aktivnosti, odnosno regulisanje međusobnih prava i obaveza između Ministarstva/općine i korisnika sredstava (investitora).

**Član 26.**  
**Završetak radova**

Nakon provedenog uređenja korisnik pismeno obavještava kantonalno Ministarstvo, odnosno općinu o završetku radova, a najkasnije u roku od 15 dana od završetka Projekta.

Stručna komisija iz člana 24. ovog pravilnika dužna je u roku od 15 dana od prijema obavijesti iz stava 1. ovog člana izaći na teren i zapisnički utvrditi da su svi poslovi po projektu završeni.

**Član 27.**  
**Obavijest**

Obavijest o visini i načinu plaćanja dostavlja se korisniku pismeno, na adresu navedenu u zahtjevu.

**Član 28.**  
**Sadržaj projekta**

Projekt zaštite i uređenja poljoprivrednog zemljišta mora sadržavati slijedeće elemente:

1. podatke o vlasniku/zakupcu (ime i prezime, adresu stanovanja);
2. podatke o instituciji/subjektu koja je izradila projekt;
3. podatke o parceli (lokacija, površina i dr.);
4. podatke o zemljištu (bonitetnu klasu, kulturu, tip zemljišta i pedološke analize);
5. analize moraju sadržavati naziv katastarske općine i broj katastarske čestice za svaku parcelu;
6. spisak predloženih mjera;
7. cjenovnik za svaku mjeru pojedinačno;
8. podatke o planiranoj proizvodnji na predmetnoj parceli sa obrazloženjem namjene planirane proizvodnje;
9. ukoliko se uređenje provodi na dvije ili više odvojenih parcela za svaku se prilaže analiza zemljišta, a u Projektu se moraju odvojeno obraditi (navesti mjere koje treba provesti na parcelama).

Plan finansiranja projekta ili druge aktivnosti:

1. iznos predviđenih ukupnih sredstava za realizaciju projekta ili druge aktivnosti;
2. iznos traženih sredstava zajedno s iskazanim ostalim izvorima u konstrukciji finansiranja (vlastito učešće i/ili drugi izvori) za realizaciju projekta ili druge aktivnosti;
3. planirani rok početka realizacije namjeravanih ulaganja - mjesec i godina;
4. predviđeni završetak realizacije navedenog projekta ili druge aktivnosti.

Projekt zaštite i uređenja zemljišta pored navedenih elemenata iz stava 1. ovog člana mora sadržavati i sve one dijelove propisane u Uputstvu o jedinstvenoj metodologiji za izradu projekata uređenja zemljišta.

**Član 29.**  
**Nezavršeni projekti**

Projekti zaštite i uređenja poljoprivrednog zemljišta iz prethodne godine, a koji nisu završeni, a već su ranije odobreni, imaju pravo apliciranja za nastavak finansiranja projekta (veći projekti, u više faza i rokova plaćanja).

**IV - NADZOR I KONTROLA**

**Član 30.**

Nadzor i kontrolu nad parcelama za koje je ostvareno pravo korištenja sredstava na osnovu ovog pravilnika vrše kantonalni poljoprivredni inspektori, odnosno službenici Federalnog ministarstva poljoprivrede, vodoprivrede i šumarstva koje u slučaju potrebe, rukovoditelj organa uprave ovlasti za izvršavanje određenih poslova nadzora i kontrole.

**Član 31.**

**Kontrola**

Kontrolu namjenskog korištenja sredstava naknada iz člana 1. ovog pravilnika vrši finansijska inspekcija i poljoprivredna inspekcija, svako u granicama svojih ovlaštenja.

**Član 32.**

**Namjenski utrošak sredstava**

Korisnik sredstava dužan je odobrena sredstva koristiti isključivo za namjenu za koju su odobrena, a za korištenje sredstava dostavljati izvorne dokumente.

U slučaju nenamjenskog korištenja sredstava i prilaganja dokumentacije koja nije u skladu sa članom 22. ovog pravilnika, a u svrhu odobrenja i korištenja sredstava, kantonalno ministarstvo, odnosno Služba i ovlaštena inspekcija, najkasnije u roku od petnaest dana od dana saznanja za nenamjensko korištenje ili neadekvatnu dokumentaciju tražit će povrat cjelokupnog iznosa sredstava sa sporednim potraživanjima i zateznim kamatama u visini zakonom propisanih.

Ugovor iz člana 25. stav 3. ovog pravilnika se otkazuje pismenim putem uz otkazni rok od 30 dana, računajući od dana dostave otkaza, na osnovu građansko-pravne regulative.

**Član 33.**

**Stupanje na snagu**

Ovaj pravilnik stupa na snagu narednog dana nakon objavljivanja u "Službenim novinama Federacije BiH".

Broj 03-3-02-255/09  
Decembar 2009. godine  
Sarajevo